

Plenchi

Bèl a bati

Bèlèm bèlèm, tringggg tringg e te ora a yega pa nos topa riba nos plenchi. Ya nos tin 2 siman di eksamen tras di lomba. Ta basta lihe e dianan ta kore pasa bai. Pues laga nos no laga nada pa mañan.

Espesialmente tuma tempu pa duna atenshon i kariño na personanan rondó di nos. Kon a bai awe, tur kos ta bon? Kon a bai na skol/trabou? Nada pret no a pasa awe. Paso hopi biaha nos ta konta kiko a bai malu of kiko a pone nos rabia of iritá. Pero tin asina tantu kosnan agradabel ta pasa i prèt, ku nos por kompartí.

Awe nos tin algun potrèt despues di EFO di e direktornan di skol despues ku nan a trese e ultimo trabounan na RK. Pa nan tambe tabata un temporada di hopi tenshon i tur dia nan mester a buska i hiba e trabounan di EFO. Nan a disfrutá di un dushi trit i a keda kombersá ameno ku otro riba e akontesimientonan rondó di EFO. Nos skolnan un bes mas a kumpli kabalmente ku nan responsabilidat. Danki na tur ku a kopera pa asina nos muchanan por a pasa nan EFO trankil. Awor ta di warda e resultado, pero e organisashon a kana hopi bon. Un danki speshal na funshonario Theo Thielman, e kordinadó di EFO pa RK. Un tremendo trabou. Danki tambe na su kolega funshonario i tur e sekretarianan ku a duna 100% pa e organisashon kana bon.

Den agènda

Dianan liber di skol

- Fakansi grandi 4 yuli te ku 10 ougustus 2016**

Konferensha pa personal skolnan katólíko 8 di ougustus 2016

Promé dia di skol pa alumnonan ta 11 di ougustus 2016.

EFO a kaba.....



St. Antoniuschool ta selebrá ku EFO ta tras di lomba.



St. Franciscus College ta selebrá ku nan a kaba ku EFO

Not'é riba bòrchi

Soeur Hedwig school a risibí Birgen Maria Auxiliadora na skol. Aki alumnonan, mayornan I dosentenan di Soeur Hedwigschool a risibí bishita di e imagen di “La Birgen Maria Auxiliadora”. Alumnonan a wòrdu prepara pa e bishita aki. Tabata un dia hopi bendishoná. Mayornan a bin un ratu pa yuda karga e imagen.





Un preñchi

Direktornan di skol ta selebrá ku e temporada di EFO ta tras di lomba. Nan a trese e ultimo trabounan RK. Nan a sinta den un happy hour pa interkambia i sosialisá ku otro. Danki na boso tur pa e bon trabou. E organisashon a kana hopi bon.





Mi ta Konta

Ketchup ta pa duna sabor

Carmen a yega kas for di trabou, saludá su tata i sinta na mesa pa kome. El a habri su "tablet" mesora i mientras e ta kome el a sigui ku su trabou.

Despues di kome el a laba e tayonan pa djis despues e subi su "tablet" atrobe pa sigui ku su trabou. Ora a pasa i banda di 10 or el a realisá ku mientras e ta trahando su tata a sinta trankil lesa buki. E no a dediká niun atenshon henter atardi kue anochi na su tata. El a sinti hopi malu. Henter dia e tata tabata na kas su so, awor ku el a haña kompañó e kompañó ta den su mes mundu.

"Papa bo ta ok". E tata a kontestá afirmativo esta ku e ta hopi bon. Carmen a sinti asina malu ku ela pidi e tata masha despensa ku e no a papia mes ku ne kasi e dianan aki. E tata a kontestá: "Ora un kuminda tin hopi bon smak i bo gusté masha, bo no ta pone ketchup ariba tòg?" Carmen a bira wak su tata ku un kara di ablif... E tata a spika su mes. Meskos ta si bo ta kompañá pa unhende ku bo stima. Su presensia ta importante i di esei bo ta disfrutá sin mester papia. Papia ta manera ketchup e ora ei.

Mucha djispou

Wela: "Tino, kon mi ta hasi pone mi wifi traha?"

Tino: "Ai no wela, e no ta dje difisil ei. Bai den settings i skohe wifi...."

Wela: "Ahan mi a mire skibi. Pero, kon mi ta skohe?"

Tino: "Skohe ... dor di primi kaminda tin wifi skibi." Kon ela ke men ku kua dede. Ban serio wela, kua dede ku ta ta bon. Djis primi.... pf pf hehe Wela."